



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

კასპის მხარეთმცოდნეობის მუზეუმი



კასპის მხარეთმცოდნეობის მუზეუმი, ისტორიული მუზეუმი ქ. კასპში (ააიპ - არასამთავრობო, არაკომერციული იურიდიული პირი), დაარსდა 1960 წ. 22 ივნისს. კ. მ. მ. ექვემდებარება კასპის მუნიციპალიტეტის მუზეუმების გაერთიანებას. მუზეუმის ფართობია 633 მ², აქედან მუდმივ ექსპოზიციას უჭირავს 199 მ², პერიოდულ გამოფენებს - 200 მ², საცავს - 108 მ².

მუზეუმის ჩამოყალიბებისას არც ერთი ექსპოზიცია და სამუზეუმო კოლექცია არ არსებობდა. პირველი ექსპოზიცია კ. მ. მ-ში 1963 წ. 5 ოქტომბერს გაიხსნა, დღეისათვის სამუზეუმო ფონდებში ითვლება 20 ათ-ზე მეტი ექსპონატი და სამუზეუმო მასალა.

კასპი. მხარეთმცოდნეობის მუზეუმის საექსპოზიციო დარბაზი.

კ. მ. მ-ში დაცულია კასპის, რენეს, მეტეხის, თეზის ტერიტორიებზე არქეოლ. გათხრების შედეგად მოპოვებული ადრე- და შუაბრინჯაოს ხანის მასალები, ყორღანებიდან მოპოვებული ძვ. წ. III-I ათასწლეულებით დათარიღებული

ნივთები, ძირითადად თრიალეთის კულტურისთვის დამახასიათებელი კერამიკა; გვიანბრინჯაოს ხანის თიხის ჭურჭელი, ძვ. წ. XIV-XII სს-ით დათარიღებული სამოსელის დეტალები, ცხენის აღკაზმულობა, სამუშაო და საბრძოლო იარაღი (აღმოსავლეთქართული ცულები, სატევრები, შუბისპირები; ძვ. წ. XIII-VII სს.), სოფ. სასირეთში შემთხვევით აღმოჩენილი მოოქრული ვერცხლის დისკო (ძვ. წ. III ს.), ელინისტური ხანის დიონისეს

ქანდაკება (ბრინჯაო, ძვ. ნ. III–II სს.) და სამტურია სურა-ოინოხოია (ახ. ნ. I ს.), შუა საუკუნეების თიხის მოჭიქული ჭურჭელი.

მუზეუმში პერიოდულად ეწყობა გამოფენები.

კ. მ. მ-ში მოქმედებს საგანმან. პროგრამები: "ეს ჩვენი წარსულია", "გაკვეთილი მუზეუმში", "მუზეუმი – სიძველეთსაცავი". მუზეუმი გამოსცემს გზამკვლევს. მას ყოველწლიურად სტუმრობს დაახლ. 600 დამთვალიერებელი.

კ. მ. მ-ს აქვს 4 ფილიალი: ივ. ჯავახიშვილის (სოფ. ხოვლე), გენერალ გ. მაზნიაშვილის (სოფ. სასირეთი), ა. და მ. ჯამბაკურ-ორბელიანების (სოფ. ლამისყანა), ო. კელაპტრიშვილის (სოფ. კავთისხევი) სახლ-მუზეუმები.

თ. ალიბეგაშვილი
